

Un paso grandi pa arte y cultura:

Aruba ta conose un Hardin di Scultura nobo



ORANJESTAD (AAN): Siman pasa a keda inaugura un Hardin di Scultura nobo na Aeropuerto Internacional Reina Beatrix. Den un ambiente festivo y artistico, Directiva di AAA pa medio di sr. Peter Steinmetz, Minister di Transporte sr. Otmar Oduber, y Minister di Cultura señora Michelle Hooyboer-Winklaar, pa medio di discursonan y cortamento di cinta, a efectua e apertura di e bunita hardin aki, cu ta situa net pa tras di e restaurante 14 Bis. Publico por bishita e hardin libremente, y tur pasahero cu ta biaha pa Merca ta pasa den e hardin aki pa bay imigracion.

AAA a inicia e proyecto aki, y a comisiona shete obra di arte nobo di e artistanan local Stan Kuiperi, Osaira Muyale, Ryan Oduber, Gilbert Senchi, Omaira Silva, Ciro Abath y Miriam de l'Isle. Cu e cooperacion priva-gubernamental aki, Aruba a tuma un paso grandi y importante den su desaroyo di tanto e calidad turistico como e calidad artistico-cultural.

E publico invita por a disfruta di un programa di inauguracion bon organiza, durante cual a devela cada obra di arte pa medio di un coreografia efectua pa bailarin profesional y tambe schoolnan di baile. Asina a combina arte visual cu arte di baile.

Un ehempel ta e scultura "Mensahe di e Cuebanan", diseña pa Stan Kuiperi, cu ta inspira riba e forman di expresion cultural mas bieu y original di Aruba, esta e dibuhonan original di cueba y baranca. Nan ta mas di mil aña bieu, y nan nificacion y funcion a bay completamente perdi den transcurso di e siglonan.

E artista Stan Kuiperi a re-interpretar e dibuhonan pa demostra cu nan diseño grafico ta mes fuerte awe cu nunca, y tambe pa sigui pone atencion riba e parti valioso aki di nos herencia y patrimonio cultural-historico pa conserva esaki pa futuro.

E composicion nobo ta expresa un deseo pa tur biahero: For di e simbolo cu ta mustra riba tera (di Casibari, mas abou), pa e simbolo cu ta parse un compas cu direccionnan di biento (di Canashito), te cu e forma di nubia cu ta move (di Fontein, mas ariba), e mensahe ta pa "Pasa un bon biahe den e nubianan".

E obra "Mensahe di e Cuebanan" a keda inaugura tambe cu un coreografia special di bailarina Wilma Kuiperi-



Jansen durante e anochi di apertura. Mescos tabata e caso cu e otro obranan, manera por ehempel e piedranan di domino "Dobel Sero" di Ryan Oduber cu a keda inaugura cu un coreografia di Alydia Wever, y "Mira un Yuana" di Omaira Silva, presenta pa Dianthe Maduro.

Publico por bishita e hardin di scultura libremente tur dia durante cualkier ora di dia, ora di biaha, of combina cu un bishita na e restaurant 14 Bis. Un palabra di pabien na AAA, Gobierno di Aruba y e artistanan local cu e bunita iniciativa aki.